

1. marts 2008

**UPA 2008/17**

UKA 2007/62

**Inuussutissarsiutinut ilinniartitaanerit inuussutissarsiutinullu  
pikkorissartitsisarnerit pillugit Inatsisartut peqqussutaata nr. 2, 31. maj 1999-  
imeersup allanngortinneqarnera pillugu Inatsisartut peqqussutissaattut  
siunnersuut**

**pillugu**

**Inatsisartut Inuussutissarsiornermut Ataatsimiititaliaata**

**ISUMALIUTISSIISSUTAA**

**Siunnersuutip aappassaaneerpeqarnerani saqqummiunneqartoq**

Inatsisartut Inuussutissarsiornermut Ataatsimiititaliaat suliarinninnermini ukuninga  
inuttaqarpoq:

Inatsisartunut ilaasortaq Jonathan Motzfeldt, (S) Siulittaasoq  
Inatsisartunut ilaasortaq Thomas Kristensen, Atassut (A)  
Inatsisartunut ilaasortaq Esmar Bergstrøm, (IA)  
Inatsisartunut ilaasortaq Ole Thorleifsen, (S)  
Inatsisartunut ilaasortaq Jens B. Frederiksen, (D)

UKA 2007-imi siunnersuummik siullermeerineq tunngavigalugu Inatsisartut  
peqqussutissaattut siunnersuut matumani pineqartoq Inatsisartut  
Inuussutissarsiornermut Ataatsimiititaliaata misissorpaa.

**Siunnersuutip imarisai**

Pikkorissaanissamik neqerooruteqarnerit pisariaqartitsinermik  
tunngaveqartinnerulernissaat siunertaralugu nunatsinni inuussutissarsiutinut  
ilinniartit avataanni inuussutissarsiutinut ilinniartitaanermut tunngasuni  
pikkorissarnernut allanit neqeroorutigineqartunut tapiissuteqarnissamut periarfissat  
annertusineqarnissaat peqqussutissatut siunnersuutikkut pingaarnertut  
anguniagaavoq.

Inuussutissarsiutinut ilinniartitaanermut tunngasuni pikkorissartitsinernut atatillugu tapiissuteqarnissamut inatsisitigut tunngavissap annertusineqarneranik, tassunga ilanngullugu praktikkernermi akissarsiaqartitsinernut maleruagassanik kiisalu suliaasaqarfiit allanngortinneqarnerisa kingunerisaannik erseqqissaatinik siunnersuut imaqarpoq.

Pikkorissartitsinernut aningaasat qanorpiaq atugassanngortinneqarnissaat nalunaarutitut ilusilerlugu maleruagassiorneqassaaq, tassungalu atatillugu 2007-imut 2008-mullu aningaasanut inatsisini ani-ngaasaliinermi tunngavigineqartunut naapertuuttumik pikkorissarnernut pineqartunut tapiissutit agguarneqarnerannut maleruagassiisumik nalunaarusiortoqarnissaa Naalakkersuisunit kissaatigineqarsimavoq, taamaalilluni pikkorissarnernut inuussutissarsiutinut ilinniarfiit saniatigut allanit neqeroorutigineqartunut aamma tapiissuteqartoqarsinnaaqqullugu.

Tassunga atatillugu pikkorissarnernut inuussutissarsiutinut ilinniarfiit saniatigut allanit neqeroorutigineqartunut tapiissuteqarnissamut aningaasanut inatsimmi aningaasaliinermi tunngavigineqartut malillugit periarfissiisoqareerpoq.

Taamaattorli inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit Inatsisartut peqqussutaata atuuttup oqaasertaliorderata kingunerisaanik taama nalunaarusiornissaq ullumikkut periarfissaanngitsoq paasineqarsimavoq. Allatut oqaatigalugu 2007-imut 2008-mullu aningaasanut inatsisini aningaasaliinermi tunngavigineqartuni oqaasertat aammalu suliaasaqarfimmuut tamatumunnga inatsisartut peqqussutaanni atuuttumi oqaasertat imminnut naapertuussorinangillat.

Tamanna tunngavigalugu maleruagassat aningaasanut inatsimmi suliaasaqarfik pillugu aalajangersakkanut sapinngisamik piaartumik naapertuuttunngortinneqarnissaat siunertaralugu UKA 07-imi tunniussivissaq qaangiutereersoq oqaluuserisassanngortitsinikkut siunnersuutip matumani pineqartup saqqummiunneqarnissaa Naalakkersuisut tulluartissimavaat, taamaalilluni ilinniartitaanikkut, piginnaanngorsarnikkut pikkorissartitsinikkullu pissutsit nalinginnaasumik tulleriaarlugit pingaarnersiorneqarnerannut atatillugu suliniutigilersaakkat 1. januar 2008-mi aallartinneqareersinnaaqqullugit. Aappassaaneerinissap UPA 08-mut kinguartinneqarnera pissutigalugu siunnersuutip atuutsinneqalernissaa soorunami kinguartinneqarpoq.

Piginnaasat ineriartortinnissaat pillugu Siunnersuisoqatigiinnit inassuteqaatit ilaatigut tunngavigalugit pikkorissartitsinernut aningaasat atugassanngortinneqassapput, tamatumani siunnersuisoqatigiit inassuteqaataat pikkorissartitsinernut inuussutissarsiutinut ilinniarfinnit neqeroorutigineqartunuinnaq taamaalillutik tunngatinneqassanatik.

Kiisalu susasaqartunik peqataatinneqartunik tamanik naammaginantumik tusarniaanissamik pisariaqartitsinerup nassatarisaanik siunnersuut UKA 07-imi tunniussivissaq qaangiutereersoq oqaluuserisassanngortinneqartariaqarsimasoq Naalakkersuisut oqaatigaat, tak. Inatsisartut siullermeerinerat pillugu immikkoortoq.

## Tusarniaaneq

Siunnersuutip Inatsisartunut nassiunneqarnerani tusarniaanermi akissutit amigaatigineqarnerat pillugu Inuussutissarsiornermut Ataatsimiititaliap uparuaaneranut atatillugu inatsisissatut siunnersuutip tunniussivissaq qaangiutereersoq oqaluuserisassanngortinneqarnerani piunasaqaataasut malinneqarsimanninnerat Naalakkersuisunit ajuusaarutigineqarpoq, tamatumalu kingorna tusarniaanermi akissutit amigaatigineqartut Naalakkersuisunit ataatsimiititaliamut nassiunneqarlutik.

Siunnersuutip Inatsisartunit aappassaaneerineqarnissaa sioqqullugu tusarniaaffigineqaaqqaartunit amerlanerusunut siunnersuutip tusarniaassutigalugu nassiunneqarnissaa Inuussutissarsiornermut Ataatsimiititaliamit kissaatigineqarpoq.

Siunnersuut pillugu tusarniaaffigineqaaqqaartunik naammagisimaarinninnerminnut nassuiaat kingulianiittoq Naalakkersuisut ataatsimiititaliamut nassiuppaat:

"Pissutsit qanoq innerat aallaavigigaanni immikkoortumi siullermi oqaatigineqareersutut, suliassami uani inatsisitigut aaqqiissuteqartoqarnissaanik pisariaqartitsineq pissutigalugu, Naalakkersuisut pingaarnertut nalilerpaat tusarniaaneq ingerlanneqarsimasoq isumannaatsumik pisimasoq.

Ataatsimiititaliamit oqaatigineqartutut tusarniagassaagaluit tusarniarneqanngitsoorsimasut pillugit, pingaaruteqarpoq erseqqissaatigissallugu inuussutissarsiutinut ilinniartitaanermi tapiissuteqartarneq pineqarmat, tamannalu soorunami inuussutissarsiutinut ilinniartitaanermi inuussutissarsiutinullu pikkorissartitsisarnermut tunngatillugu inatsisartut peqqussutaat tunngavigalugu aningaasanullu inatsit naapertorlugu suliaammata.

Kikkut tusarniarneqartariaqarnersut pillugu nalilersuineri, oqaatigineqareersutut inatsisitigut tunngaviusut pikkorissartitsineri pineqartuni kikkut tapiiffigineqarsinnaanerannik tunngaveqartinneqarpoq. Allatut oqaatigalugu inuussutissarsiutinut ilinniartitaanermi inuussutissarsiutinullu pikkorissartitsisarnerni peqqussummi pineqartut, aammalu Inatsisartut sulisoqarnermut akitsuummik inatsisaat tapiissutissat akilersortinneqarneranni inatsisitigut tunngavigineqartut, inatsisip § 2-a naapertorlugu, inuussutissarsiutinut ilinniartitaanermut attuumassuteqartuni taamaallaat tapiissuteqartoqarsinnaasoq, taamaattumillu ilinniartitsisut perorsaasullu pikkorissartinneqarnerinut tapiissutit soorunami inatsisini tunngaviusut avataaniittut, tamatumalu kingunerisaanik assersuutigalugu IMAK tusarniaanermi ilaatinneqanngitsoq, soorluli aamma Ilinniagartuut Kalaallit Nunaanni Kattuffiat (ASG) taamatut inissisimasoq, tassami taakkua allallumi inuussutissarsiutinut ilinniartitaanerit avataaniittuusut. Kingulliullugit

taaneqartunut tunngatillugu ilanngunneqassaaq gruppit pineqartut pikkorissartitsinernut tunngatillugu tapiiffigineqarnissamut allanik periarfissaqarmata.

Tassungalu atatillugu oqaatigineqassaaq siunnersuutip siullermeerneqarneranut atatillugu Inatsisartunut ilaasortat ilaata oqaatigimmagu pikkorissaanissamut aningaasaliissutit ilinniagalinnut amerlanerusunut iluaqutissanngortinneqartariaqaraluartut, assersuutigalugu socialrådgiverinut socialpædagoginullu, tamanna inatsimmi tunngaviusunik paatsuuinermik tunngaveqarsimassaaq, soorluli soqutigisaqatigiit pineqartut aningaasanut inatsimmi isumagineqareersimasut, tassami kontomi pingaarnermi 30.01.03.-mi Pikkorissartitsinerit ilinniaqqinnerlu isumaginninnerup iluani 9,5 mio. kr.-it immikkoortinneqarsimammata.

Ilanngullugulu eqqaasitsisutigineqassaaq, pikkorissartitsinernut tapiissuteqartarnissamik nalilersuinerit aallaaveqarmata siullermik nioqqutsisiornermi suliffeqartunut ilaatigullu kiffartuussinermi suliffeqartunut pikkorissartitsinernut sammitinneqassasut. Tassungalu atatillugu qitiulluinnarpoq inuussutissarsiortut siuliani pineqartut immikkut navianartorsiortuusut, suliffeqarnermi piumasarineqartunik naammassinninniarnissaminnut, tamannalu assersuutigalugu ilinniartitsisunut perorsaasunullu atuutinngitsutut nalilerneqartariaqartoq, tassunga ilaallutik inuussutissarsiortut allat inuussutissarsiutinut ilinniartitaanerup avataani inissisimasut, atuagarsonermik aallaaveqartunik annertunerusumik ilinniagaqartuusut.

Kingulliit sanilliunneqassapput Inatsisartut sulisoqarnermut akitsuummik inatsisaanut oqaaseqaatini allaaserineqartunut, tassanimi allaaserineqarmat suliffissaaleqisut nalunaarsorneqarneranni ersittoq inuit piffissani sivikinnerusuni sivilunerusuniluunniit suliffissaaleqinermik eqqorneqartartut tassaannerusut inuit ilinniagaqarsimanngitsut, imaluunniit piginnaanngorsaataasumik allamik ilinniagaqartut."

Taamaalillutillu Naalakkersuisut tamanna tunngavigalugu naliliipput tusarniaaneq naammaginatut tunngaveqarluni ingerlanneqarsimasutut isigineqartariaqartoq, soorluttaaq eqqaamaneqartariaqartoq inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit inatsisartut peqqussutaata atuuttup allanngortinneqarnissaanut siunnersuuteqarnermi siunertarineqartoq tassaamat inuussutissarsiutinut ilinniartitaanerit tunngasuni tapiissutit pillugit maleruagassat aningaasanut inatsimmi aningaasaliinermi tunngavigineqartunut aammalu suliffeqarnermi akitsuut pillugu inatsisartut inatsissaanni agguaanissamut innersuussutinut naapertuuttunngortinneqarnissaat.

## **Tusarniaanermi akissutit imaattunik oqaaseqaateqarnissamut tunngavissaqalersitsipput:**

Inuussutissarsiutinut ilinniartitaanerit inuussutissarsiutinullu pikkorissartitsisarnerit pillugit inatsisartut peqqussutaat tunngavigalugu inuussutissarsiutinut tunngasuni oqartussaasut susassaqtut Naalakkersuisunit tusarniarneqarsimasut Inuussutissarsiornermut Ataatsimiititaliamit maluginiarneqarpoq. Soorluttaaq ataatsimoortukkuutaat allat, soorlu ilinniartitsisut isumaginninnermilu perorsaasut suliaasaqarfimmu tassunga ilaatinneqanngitsut ataatsimiititaliamit maluginiarneqarpoq. Taamaattumik ataatsimoortukkuutaat taakku tusarniaanermi ilaatinneqarsimanngillat.

Tamanna tunngavigalugu nutaamik tusarniaanissaq Naalakkersuisut tunngavissaqarsorisimanngilaat.

Tamanna ataatsimiititaliamit tusaatissatut tiguneqarpoq.

Tassunga atatillugu ataatsimiititaliamit erseqqissaatigineqassaaq peqqussummik naleqqussaanerup pingaarnertut saneqqunneqarsinnaanngitsutullu nassatarimmagu susassaqtut tamarmiusut inatsimmi assigiimmik pineqarnerat, tamatumani apeqqutaatinneqarnani immikkoortukkuutaat ilaat isumaqatigiissutit suliffeqarnermiluunniit isumaqatigiissutit allat aqqutigalugit allanik periarfissaqarnersut.

## **UKA 07-imi Inatsisartut siullermeerinerat**

Siunnersuut Inuussutissarsiornermut Ataatsimiititaliami suliarineqartussatut Inatsisartunit innersuussutigineqarpoq.

Tunniussivissaq qaangiutereersoq immikkoortoq Inatsisartunut oqaluuserisassanngortinneqarpoq ullorlu 19. oktober 2007-imi ullunik marluinnarnik periarfissinneqarluni siullermeerneqarluni. Taamatut atugassaqtitsilluni inatsisissatut siunnersuutip isumannaatsumik suliarineqarnissaa partiit oqaaseqartartuinit piareersarneqarsinnaanngitsoq erseqqimmat immikkoortup siullermeerneqarnerani periaaseq sakkortuumik uparuarneqarpoq.

Siullermeerinermi makku pissutissaqarluartumik uparuarneqarput:

- Siunnersuut inuiaqatigiinnut annertoorujussuarmik kinguneqassasoq, tassunga ilanngullugit illuatungeriinnut susassaqtunut kinguneqassasoq,
- Siunnersuutip akuersissutigineqannginnerani allannguutissatut siunnersuuteqarnissaq taamatullu tusarniaaneq sukumiinerusoq pisariaqartinneqarsinnaasut, aammalu
- Taamatut periaaseqarnikkut siunnersuutip kingunerisasaanik sukumiisumik misissuinissamut Inatsisartut periarfissakillioortorujussuussasut,

taamaalillutillu illuatungeriinnik susassaqtunik tusarniaanissamut aamma piffissakillioortorujussuussasut.

Tamakku saniatigut Inuussutissarsiornermut Ataatsimiititaliap makku oqaatigisinnaavai:

- Tunniussivissaq qaangiutereersoq oqaluuserisassanngortitsinissamut ullormullu oqaluuserisassani immikkoortup taassuma nukingiullugu suliarineqarnissaanut tunngavissanik qularnaatsunik paasissutissiisoqarsimanngitsoq,
- Siunnersuutip imarisai naalackersuinikkut isumaqatigineqanngitsut siullermeerinermi ersarissisoq, tamatumanilu inatsisissatut siunnersuut nukingiullugu suliarineqartussatut naleqqutinngitsoq erserseqqissarneqaqqilluni,
- Tusarniaanermi atortut inatsisissatut siunnersuummut nalunaarutigineqartumut ilanngullugit tunniutissallugit Naalackersuisut pisussaaffigisaat pigineqanngitsut, taamaattumillu ullormut oqaluuserisassani immikkoortup naalackersuinikkut suliarineqarnissaanut tunngavissaq pingaarutilik amigaatigineqartoq,
- Piffissaq tusarniaaffiusoq paasissutissiissutigineqarsimanngitsoq, tamatumalu angusanik tusarniaanerullu ingerlanneqarsimasup nalinganik naliliinissaq piuminaallisinnerullugu,
- Tusarniaaffigissallugit piukkunnaatillit, soorlu SPS, PPK, PIP aamma IMAK tusarniaaffigineqarsimanngitsut, soorluttaaq tamanna siullermeerinermi aamma uparuarneqartoq. Aammattaaq Peqqissutsimut Pisortaqarfik peqqinnissakkut sulisut ilinniartitaanikkut inissisimanerannut pingaarnertut akisussaasuusoq pinnagu Peqqissutsimut Ilinniartfiup tusarniarneqarnissaanut Naalackersuisut pissutissaqarsimanerat eqqumiiginarsinnaasoq, aammalu
- Ataatsimiititaliami peqqissaartumik piviusorsioortumillu suliaqartoqarnissaa assigiinngitsut tunngaannit, tassunga ilanngullugu Inuussutissarsiornermut, Suliffeqarnermut Inuussutissarsiuutinullu Ilinniartitaanernut Naalackersuisumit ugartorneqartoq.

Tamanna tunngavigalugu siunnersuutip aappassaaneerineqarnissaata UPA 2008-mut kinguartinneqarnissaa Inuussutissarsiornermut Ataatsimiititaliamit qinnutigineqarpoq.

### **Inuussutissarsiornermut Ataatsimiititaliap siunnersuummik suliarinninnera**

Aappassaaneerinissaq sioqqullugu Naalackersuisunut ilaasortamut ilassutitut paasissutissat Inuussutissarsiornermut Ataatsimiititaliap qinnutigai.

Siunnersuutip Inatsisartuni suliarineqarnissaa sioqqullugu sooq taama sivikitsigisumik piffissaqartitsilluni nalunaaruteqartoqarsimanersoq nassuiaatigeqqullugu Naalackersuisunut ilaasortaq Inuussutissarsiornermut Ataatsimiititaliamit qinnuigineqarpoq. Soorluttaaq tusarniaanermi akissutit amigaatigineqartut siunnersuummut ilanngunneqanngitsut ataatsimiititaliamit

uparuarneqarsimasut. Inatsisissatut peqqussutissatullu siunnersuutininik nalunaarutiginninnermi periusissatut piumasaqaatinut tamanna naapertuutinnngimmat ataatsimiititaliap Naalakkersuisunut eqqaasitsissutigissavaa.

Siunnersuutip Inatsisartunit suliarineqannginnerani nalunaarutiginnissaanut sivikitsuarsuarmik piffissaqartitsineranut aammalu nukingiussamik suliarineqarnissaanik qinnuteqarnermut pissutaasut sukumiinerusumik nassuiaqquneqarnerannut atatillugu Naalakkersuisut ataatsimiititaliamut akissumminni ima allapput:

"Tassunga atatillugu eqqaasitsisutigineqassaaq, Inatsisartut sulisoqarnermi akitsuummik inatsisaat nr. 10, 2. november 2006 aqutugalugu Sulisoqarnermut akitsuummik 1. januar ukioq manna atortussanngortitsinerannut atatillugu atorunnaarsinneqarmat piffissaq taanna tikillugu suliassaqqarfimmi inatsisitigut tunngaviusimasoq inuussutissarsiutitigut ilinniartitaaneranut sulisitsisut akiliutaat pillugit Inatsisartut inatsisaat nr. 16., 23. november 1989-imeersoq.

Inatsisartullu siunertarisimagunarpaat, Inatsisartut inatsisaannut nassuiaatitut oqaasertani allanneqarsimasutut, sulisoqarnermut akitsuut pillugu inatsisip Inuussutissarsiutinut Ilinniarfiit (Brancheskoler) kisimik pinnatik aammali allat pikkorissaanernik pisortanit tapiiffigineqartunik ingerlatsisartut pikkorissaanernik neqerooruteqarsinnaatinneqassasut, tassami oqaaseqaatini nassuiaataasuni eqqaaneqareersutut allassimammat  
"*...pikkorissaanernut aningaasaliissutit pisariaqartitsineq ingerlatsinerlu naapertorlugit aqunneqassapput, ilaatigut Piginnaasat ineriartortinnissaat pillugit siunnersuisoqatigiit, aammalu Inuussutissarsiutinut Ilinniarfiit brancheudvalg-iillu inassuteqartarnerat tunngavigalugit. Kisiannili siunnersuineranut ilitersuinernullu qitiusunik ingerlatsivinngortussani aamma...."*

Pikkorissaanernut tapiissuteqartarnermi inatsisitigut periarfissiinerup annertusineqarnera aamma aningaasanut inatsisip Inatsisartunit akuersissutigineqarnerani aalajangersarneqartunut naapertuuppoq. Kisiannili aamma ukioq manna siusinnerusukkat Inatsisilerineranut allaffimmiit aammalu Akileraartarnermut Pisortaqqarfimmiit sulisoqarnermut akitsuummik atortitsinermi pisortaqqarfiusumiit ilisimatitsisutigineqarpoq, inatsit pineqartoq pikkorissartitsinissanut aningaasaliissutinik akuersissuteqartarnermi tunngavigineqarsinnaanngitsoq, inatsit pineqartoq akiliuteqartitsisarnermut inatsisaammat, taamaattumillu pikkorissaanerni aningaasaliissutinik akiliuteqarnermi tunngavigineqarsinnaanani, aamma inatsisip nassuiaataani § 2-anilu nalunaarneqarsimagaluartoq aningaasat inuussutissarsiutitigut ilinniartitaanermit pikkorissartitsisarnermut piginnaanngorsaanernullu atorqeartussaasut. Pissutsillu taamaannerat aatsaat 2007-ip upernaavani ersarissisimavoq..

Inuussutissarsiutinut ilinniagaqarnermut sulisitsisut akiliutaat pillugu Inatsisartut inatsisaata oqaatigineqareersutut atorunnaarsinneqarnerata kingunerisaanik, "akiliisarnermi" inatsisaasup, inatsit atortussalerinermut taamaallaat inatsisaasutut taaneqarsinnaavoq, inatsisartut peqqussutaat inuussutissarsiutitigut ilinniartitaanernut aamma inuussutissarsiutitigut pikkorissartitsisarnerni aningaasaliussanik tunniussisarnermut taamaallaat atorneqarsinnaalerpoq.

Inatsisartut peqqussutaat taanna taamaattoq tapiissutinik tunniussisarnissamut periarfissaqartitsinngilaq, inuussutissarsiutitigut ilinniagaqarnermut sulisitsisut akiliutaat pillugit Inatsisartut inatsisaanni periarfissaatinneqartutut, aningaasanullu inatsimmi aningaasaliissuteqarnermi periarfissaatinneqartutut, tassami pikkorissaanerit akuersissutigineqarsimasut annertunerpaatigut Inuussutissarsiutinut Ilinniartitsisarnerni ingerlanneqartussaammata. Taamaattoq Inatsisartut peqqussutaanni periarfissaqartitsisoqarpoq malittarisassamik pineqartumik saneqqutsinissamut, peqqussummi § 51 naapertorlugu misileraalluni ingerlatsisoqartillugu. Pineqartoq kingulleq tunuliaqutaralugu ukioq manna siusinnerusukkut nalunaarusiortoqarpoq, imarisamigut annertunerpaatigut inatsisartut peqqussutissaattut siunnersuummut imarisamigut assingulluinnartumik, inatsisartut peqqussutissaattut siunnersuummik inuussutissarsiutinut ilinniartitaanermi inuussutissarsiutinullu pikkorissartitsisarnerni inatsisartut peqqussutaata allangortinneqarnissaanik siunnersuutaasumik, aningaasanut inatsimmi aningaasaliissuteqarnermi tunngavigineqartut naapertorlugit tapiissuteqartarnermut maleruagassat aaqpinneqarnissaat siunertaralugu, aammalu ilinniagaqarnermut sulisitsisut akiliutaat pillugu inatsisartut inatsisaannut naapertuuttunngortinniarlugu.

Ukioq manna siusinnerusukkut nalunaarut tusarniaassutigineqareermat Inatsisilerinermut allaffimmut nassiunneqarpoq, tassanngaanniillu nalunaarutigineqarpoq Inatsisartut peqqussutaanni § 51 atorneqarsinnaanngitsoq nalunaarusiornermut tunngavigissallugu, nalunaarusiami siunertarineqarmat tapiissuteqartarnerup aqunneqarnissaa, aningaasanut inatsimmi aningaasaliissuteqarnermi tunngavigineqartut sulisitsisullu suliffeqarnermi akiliutaat pillugit inatsit tunngavigalugu, misileraanertut isigineqarsinnaanngitsumik, aaqquissuussinertulli ataavartutut. Pissutsit taamaalipput, naak siunertaasimagaluartoq kingornatigut inatsimmut allanguutissatut siunnersuusiornissaq, Inatsisartunut saqqummiunneqartussamik, siunnersuummut piffissaliussat naapertorlugit tunniussisimanissamik tunngaveqarluni."

Aammattaaq Naalakkersuisut allapput



"Tamatum kingunerisaanik nalilernerqarpoq sukkanerpaamik pikkorissaanernut aningaasaliissuteqartoqartillugu inatsisitigut toqqammavissaasunik maleruagassiortoqartariaqartoq, tassuuna pikkorissaanernut aningaasaliissutit aqunneqarnissaat aqqutissiuunnarlugu, sulisoqarnermut akitsuut pillugu inatsimmi aningaasanullu inatsimmi aningaasaliissutinut tunngaviusut naapertuuttunngortinneqarniassammata, tamannalu Naalakkersuisut anguniarsimavaat siunnersuutip matuma saqqummiunneqarneratigut. Taamaattumillu ajornarsimavoq nalinginnaasumik piffissaliussat malinneqarnissaat."

Inatsimmik naapertuuppallaanngitsumik suliarinnissimaneq Inuussutissarsiornermut Ataatsimiititaliap immikkoortumik suliarinninnermini maluginiarpaa. Inatsisit nutaat ingerlaavartumik malitseqartinneqartarnissaat qulakkeerneqarsimasorinanngilaq. Inatsisinik suliarinninnerit siunissami sukaterneqassasut ataatsimiititaliamit kaammatuutigineqassaaq, taamaalilluni inatsisip sapinngisamik pitsaanerpaamik tunngaveqarnissaa piffissaagallartillugu peqqissaartumik qulakkeerneqarsinnaaqqullugu. Inatsisitigut tunngavissat pisariaqartut inatsisip siunertarisaata eqquutsinneqarnissaanik qulakkeerisussat Aningaasanut inatsisip akuersissutigineqarnerani qulakkeereerneqartannginnerat akuersarneqarsinnaanngilaq.

Aammattaaq sulisoqarnermut akitsuutip imarisaa siunertarisaalu siammasippallaartumik oqaasertaliorneqarsimasut ataatsimiititaliaq isumaqarpoq, taamaattumillu inuussutissarsiutinut ilinniartitaanernut tapiissutinut atatillugu neqerooruteqartartussat taakkuninngalu tiguisartut peqqussutip imarisaani erseqqinnerusumik killiliivigineqarnerat taamaaqataanik ersernerluppoq.

Tamatum Naalakkersuisut peqqussutissatut siunnersuutitut saqqummiussaannut allannguutissatut siunnersuummik saqqummiussinermigut aaqqiivigineqarnissaa ataatsimiititaliap kissaatigaa. Allannguutissatut siunnersuummik saqqummiussinermigut peqqussutip erseqqinerulernissaata aammalu inuussutissarsiutinut ilinniartitaanerni pikkorissarnernut sapinngisamik annertunerpaamik sammitinneqarnissaata qulakkeerneqarnissaat ataatsimiititaliap kissaatigaa. Pikkorissartut ataasiakkaat piginnaasaqarnerulernerannik pikkorissarnermi peqataanerup kinguneqarnissaa ataatsimiititaliamit kissaatigineqarpoq.

### **Piffissaq atuutsitsilerfiusussaq**

Naalakkersuisut siunnersuutannik maannangaaq akuersissutiginninneq Inatsisartut peqqussutaata ki-ngoortumik atuutilerneranik kinguneqassaaq. Piffissap atuutsitsilerfiusussap allanngortinneqarnissaa siunertarlugu pingajussaaneerinissamut allannguutissatut siunnersuummik Naalakkersuisut saqqummiussisariaqarnerisut isumaliuutigeqqullugu Naalakkersuisut ataatsimiititaliamit kaammattorneqarput.

## **Inassuteqaat**

Tamanna tunngavigalugu siunnersuutip Inatsisartunit akuersissutigineqarnissaa  
**Inuussutissarsiornermut Ataatsimiititaliap isumaqatigiittup inassutigaa.**

Taamatut oqaaseqarluni Inatsisartut Inuussutissarsiornermut Ataatsimiititaliaata  
siunnersuut aappasaaniigassanngortippaa.

Jonathan Motzfeldt  
Siulittaasoq

Thomas Kristensen

Ole Thorleifsen

Esmar Bergstrøm

Jens B. Frederiksen